

DISSERTATIO SOLENNIS PATHOLOGICO-MEDICA
QVA

GRAVIDITAS APPARENS

TVMORE OVARIUM DEXTRI ENORMI ORTA
PER TRES ANNOS CVM DIMIDIO DVANS
TANDEMQUE IN ASCITEM TERMINATA

PRAESIDE

N. ABRAHAMO VATERO

PHILOS. ET MED. DOCT. ET PROF. PVBL.

ANATOM. ET BOTAN. SVBSTITVT.

NEC NON

SOCIETATVM IMPER. NAT. CVR. GERMAN.

ET REG. ANGLIC. SOCIO

PRO LICENTIA

MMOS IN ARTE SALVTARI HONORES
ET PRIVILEGIA MORE MAIORVM CAPESSENDI

EXPENDITVR ET

D. IV. AVGVSTI M DCC XXII.

SPECIMINIS INAVGVRALIS LOCO

AD DISCEPTANDVM EXPONITVR

a

PAVLO GOTTLOB BERGERO

ILEBVRG. MISN.

MEDICINAE CANDIDATO.

VITEMBERGAE, LITERIS VIDVAE GERDESIAE.


urae Explicatio.

C. D. Ovarium dextrum
insigniter expansum, ac
totum in hydatides,
muco plenas, degene-
ratum, figuram & ma-
gnitudinem uteri prae-
gnantis exhibens.

pertura per medium fa-
cta, per quam hyda-
tides numerosissimae
b., uariae magnitudi-
nis, prodibant.

Hydatides, apertione tumo-
ris denudatae.

Hydatides, tunica externa
ouarii adhuc tectae.





E. F. G. Fundus ut
tus.

d. Incisio in eo fac

e. Tuba Fallopiana

f. Ovarium sinistru

g. Ligamenta uteri

h. Ligamenta uteri
uespertilionu

i. Collum uteri.

k. Orificium uteri i
ualde tumid
tensionem, a
& tractione u

l. Tubae Fallopia
trae uestigiur



Q. D. B. V.

PRAEFATIO



enerationis in animalibus negotium, uti abstrusissimum, & ab humanorum acie oculorum remotissimum est, ita ab omni tempore naturae miraculum merito reputatum fuit, in quo plenarie detegendo sagacissimi naturae uenatores, adhibita licet omni industria, frustra se tandem laborasse, senserunt. Mirum propterea neminem habere debet, illos in hoc delineando tantopere titubare, ac in tam uarias circa conceptionem, foetus formationem, atque partum, sententias abire. Conceptionem quidem alii in ouario, alii uero in utero fieri, disputant, quidam eam ab animalculo, quidam a spirituosissima

feminis masculini aura peragi, contendunt. Formationem corporis alii animae, aut principio cuidam plastico, adscribunt, alii e contrario a staminum, in ouulo praecexistentium, extensione atque explicatione deriuant. Partum ipsum quidam defectui nutrimenti, quidam spatii angustiae, quidam aëris liberioris dene-
gationi, alii legi naturae adiudicant, ob quas causas foetus diutius in ergastulo suo contineri nequit, sed exitum sibi parat. Tempus quoque pariendi, in homine quibusdam uidetur incertum, quod alii in hoc, aequae ac in brutorum familia, certissimum esse, demonstrant. Praecipue uero grauiditatem ueram, a spuria & apparente diiudicare, difficillimum deprehenditur opus, quamobrem de signis certis ac infallibilibus cogitare coacti sunt Medici, quibus illa ab hac distingui possit, & debeat. At nec talia sufficientia semper adesse, docent casus singulares & rariores, ubi foeminae, praecipuis licet ingrauidationis signis apparentibus, partum tamen nullum ediderunt. Exemplum huius rei sat curiosum, nobis ante duos annos, hic loci uidere contigit in muliere, quae, ob signa quaedam impraegnationis apparentia, grauida sibi aliisque visa est. Tempore autem partui desti-

destinato praeterlabente, ac tumore abdominis in nimiam molem accrescente, spes tandem omnis partus futuri euanuit. Foemina nihilominus constanter in ea opinione permansit, se uere grauidam fuisse, foetumque in utero mortuum aut corruptum, aut induratum in corpore adhuc latere. Ea de causa ipsa a nobis, repetitis precibus, efflagitauit, ut corpus eius post mortem, sibi imminens, aperiremus. Foemina proinde, elapsis ab impraegnatione imaginata, tribus annis cum dimidio, fatis defuncta, hunc laborem tanto lubentius in nos suscepimus, quanto maior spes nobis affulsit, fore, ut notatu digna quaedam obseruatio oculis nostris se exhiberet, in quo nequaquam nos fefellimus. Aperto enim cadauere, ouarium dextrum, in insignem tumorem expansum, inuenimus, qui grauiditatis huius apparentis, ac ascitis subsecuti causa extitit. Operae igitur pretium facturos nos esse duximus, si casum istum, haudquaquam uulgarem, in praesenti, loco speciminis inauguralis exhiberemus, eiusque occasione de grauiditate falsa commentareretur. Quod ut Deus Ter Optimus Maximus, ad sui gloriam, aegrorumque salutem dirigat, optamus, piisque precibus efflagitamus.

HISTORIA

Mulier, quadraginta & aliquot annos nata, postquam, partu perquam difficili, gemellos procreasset, de nouo impraegnationis signa percipere sibi uidetur. Retinentur in ea menses, ad hoc usque tempus fluentes, abdomen sensim incipit intumescere, lacti similis liquor in mammis turgescit, motus quoque, foetum mentientes, in abdomine ab ipsa sentiuntur. Constante enim illa affirmavit, se artus embryonis, abdomen percutientes, manu eidem applicata, tactu iudicare potuisse, in quo quidem maximopere se fefellit. Superueniente uero, uti ipsa referebat, lapsu grauiori, motus hi cessant, tempus partui praescriptum transit, tumore nihilominus uentris, duriori quidem, sed primum non adeo ponderoso, ac molesto, permanente. Quid itaque mirum est, quod illa sibi persuaserit, foetum in utero extinctum permansisse, praecipue, quoniam illa primum, praeter tumorem istum, nil quicquam mali sensit. Successu tamen temporis, omnia in peius abire ceperunt, intumescencia abdominis nimium quantum creuit, respiratio difficilior reddita, ingressus molestior factus: donec, abdomine ad rupturam usque aucto, expletis tribus annis, cum dimidio, misera tandem fati succumberet. Desiderio foeminae demortuae

tuae, ac mariti non minus, quam curiositate rei excitati, ad sectionem corporis statim accessimus. Abdomine autem durissimo inciso, ultra XXX. mensurae aquae flavescentis foetidissimae effluebant, naribus spectatorum non parum molestae. Liquore exhausto, in conspectum prodiit tumor insignis, caput humanum magnitudine superans, figurae ovalis, quem omnes statim uterum, monstri quidpiam alentem, augurabant. Eodem uero inferius ab angusto suo principio resecto, ac transuersim inciso, nullam in eo cavitatem, uterinae caernae similem, detegere licuit, sed totus ex capsulis rotundis, diuersae magnitudinis, liquido mucoso atque purulento repletis, coagmentatus uidebatur. Sedem itaque uteri naturalem, cavitatem peluin uocatam, ulterius perlustrantes, nil uteri simile apparuit, usque dum in uaginae prolapsum inquisituri, manum in ossis pubis hiatus intruderemus, quo ipso uterum, intra pudendum egressum, ad interiora retraximus. Tum demum igitur clarum redditum est, tumorem istum praegravandem non uterum, sed ovarium dextrum, in hanc molem excretum, esse. Viscera abdominis reliqua nil omnino labis monstrarunt, praeterquam, quod ab aquis putridis, tamdiu ibi stagnantibus, corruptio ingruens in superficie se manifestaret. Renes tamen
flac-

flaccidi, & ureteres, inprimis dexter, ob tumoris ad illud latus inclinationem, ampli, ac urina repleti, observabantur, ita, ut dexter ad digiti crassitiem accederet, ac, in suo e rene egressu, saccum, nucis juglandis capacitate, exhiberet, vesica non minus urinaria exigua & contracta, ac omnino vacua reperiebatur.

THE S. I.

Priusquam ad exempli praesentis, grauiditatis falsae, contemplationem nos accingamus, non inutile fore, existimamus, conceptionem atque ingrauidationem ueram, eiusque signa examinare. Mittimus autem, & consulto negligimus ea, quae de animae humanae ortu, de corporis ab anima fabricatione, de generatione animalium ex animalculis, in semine masculino fluctuantibus, perhibentur, ac disputantur. Ea enim omnia, utpote altioris indaginis argumenta, controuersias inanes & superfluas, nullo quidem pacto terminandas, generant, multisque erroribus, cum religione & ratione pugnantibus, praebent occasionem. Etenim quis tanto gaudet ingenii acumine, ut idoneis rationibus demonstret, quomodo anima nostra a parentibus procreetur, quando-

doquidem religioni repugnat, animas omnes primitus jam tum una & semel a Deo creatas esse, aut adhuc hodie singulis generationum actibus ab Eo creari. Corporum quidem animalium rudimenta in primorum uiuentium ouariis, ac humanorum figillatim in Euae ouario iam tum creata fuisse, & praeextitisse, rectius cum *Swammerdammio*, *Malpighio*, & Celeberrimo *Bergero*, de *Nat. Human. L. II. c. i.* statuendum erit, quoniam hoc nec religioni, nec rationi contrariatur. Quamuis enim hoc intellectu comprehendere, ac sensibus assequi nullatenus licet, ex eo tamen sequi uidetur, quoniam singula ouula cicatricibus suis donari, per experimenta, in ouis gallinarum instituta, constat, quae propterea nuda tantum euolutione & extensione opus habent. Quamobrem nulla uidetur adesse necessitas, ut animae rationali corporis fabricationem adscribamus, eamque architecti munere in extruendo corpore fungi, existimemus, quia, ipsam rerum, in eodem actarum, parum consciam esse, experientia docet. Multo minus *Loewenhookii* sententia, de generatione animalium ex animalculis uiuis, femini uirili innatantibus, talis est, quae nobis probari potest, quoniam hoc pacto ex multis millibus animal-

B

culo-

culorum uiuorum, cum Semine una uice emis-
forum, unicum tantum, aut certe pauciora, co-
haerent, & foetum humanum constituunt.
Quid autem de reliquis fiat, non patet; quae
tamen, quoniam uita iam tum gaudent, ani-
mam humanam certe, ante conceptionem, pos-
sidere deberent. Ita uero embryo a patre unice
deponderet, cui mater nil, praeter nidum ac
nutrimentum praeberet: id quod sane difficul-
tates insuperabiles creat.

THES. II.

Posthabitis itaque sententiis istis, parum pro-
babilibus, ad eorum potius castra transimus,
qui conceptionis rationem in eo collocant,
quando in coniunctione maris cum foemina,
pars feminis spirituosa, ouulum ingressa, in sta-
minibus, in hoc praeeexistentibus, ac figillatim
in puncto, uti in ouis incubatis uocatur, sali-
ente, seu rudimento cordis, motum uitalem
expansiuum excitat: quo ipso in homine ani-
ma, modo incomprehensibili, producitur, ac ge-
neratur. Haec quippe sententia, de staminum
corporis in ouulo praeeexistentia, neque sacris
literis fidem derogat, neque potentiam diui-
nam infringit, potius eandem clarissime, non si-

ne singulari summae admirationis incitamento, declarat: uti pluribus hoc demonstratum a *B. Brendelio, dissertat. de embryone, in ouulo ante conceptionem praeexistente.* Quando itaque semen masculinum, apta utriusque sexus organorum genitalium combinatione, in aruum muliebre iniicitur, aura eius subtilior per tubam Fallopianam, eo tempore ovario, mediantibus fimbriis expansis, applicatam, intra ouulum, ibidem latens, penetrat, atque illud foecundat. Non quidem ignoramus, Medicorum celebrium quamplures, conceptionem in ovario, ouulique foecundati per angustum tubae canalem descensum, difficilem iudicantes, in ea haerere sententia, ova ante conceptionem ad uterum descendere, ibique demum a semine masculino foecundari. Alii e contrario nouum aliquod ovarium, in orificio uteri interno, stabilire uoluerunt, expeditiorem ita uiam censentes, qua semen proliferum facilius in ouula, ibidem collocata, penetrare possit, quam si per tubam, cum ovario non cohaerentem, sed libere in abdomine fluctuantem, ad ouaria haecenus nota transire opus habeat. Vtrisque autem contradicunt foetuum, in tuba repertorum, exempla non tantum, sed etiam Celeberrimi Ruyschii obser-

obseruationes curiosissimae, qui non solum semen in tubis Fallopiianis foeminarum, a paucis diebus grauidarum, sed etiam ouula foecundata, turgida in ouariis earum aliquoties reperit. *uid. Thes. Anat. VI. Tab. IV. fig. 1. & Aduersar. Anat. Dec. I. Tab. I. fig. 2. & Tab. II. fig. 3.* quo loco etiam ad Epistolam Clarissimi Etmulleri, de ouario nouo respondet, pluribusque solidissimis argumentis illud destruit.

THE S. III.

Ouulum foecundatum, oborta intrinsecus turgescentia, & motu expansiuo in staminibus, ac concitato propterea largiori affluxu succorum, successiue e claustris, quibus firmiter antea cohaerebat, prorumpit, ac, rupta exteriori ouarii membrana, uel dilatatis potius foraminulis, aut osculis, in hac, post foecundationem, a *Verheyen* in brutis obseruatis, *Anat. Tr. II. c. 24.* ad extra tendit, atque a tubae parte ampliori exceptum, uersus uterum descendit. Quamprimum ad uterum accessit ouulum, breui post, explicatis magis in exteriori eius tunica fibris, iisque intra substantiam uteri infinuatis, cum hoc tandem cohaeret. Afferuamus nos, inter rariora, ouulum humanum, nucis auelanae

lanæ magnitudine, in cuius cavitate foetus, muscam referens, a funiculo umbilicali pendet. Huius facies externa, ex parte fibrosa, penicilli instar, apparet, reliqua superficies levis atque compacta, qualia ouula nondum aperta, exhibet laudatus *Ruyfchius*, l. c. *Tab. 1. fig. 2. 3.* Locus iste pilosus atque fibrosus haud dubie est, ubi ouum cum utero connectitur, atque in quo placenta tandem generatur. Quoniam uero harum fibrarum, & totius oui expansio, a succorum ipsius foetus motione, ac circulatione pendet, hinc manifestum est, per easdem fibras, cum uasis uterinis connexas, nutrimentum a matre ad foetum deriuari. Per hanc itaque viam embryo tenerimus, intercedente funiculo umbilicali, succum nutritium omnem primis mensibus haurit, donec tandem, eodem magis perfecto, idem quoque liquorem amnii circumfusum, mediante ore, capere ac deglutire possit: quorum succorum beneficio, foetus ad plenariam sui perfectionem, & magnitudinem perducitur.

THES. IV.

Circumdatur foetus membrana duplici, quarum externa chorion, in qua uasa sanguifera

fera copiosissima, ex umbilico protensa, & placentam uidere licet; interior uero amnion, quod succum alimentitium, & foetum ipsum continet, appellatur. His accedit tertia, a figura, quam in brutis habet, farciminalis, seu allantois uocata, quae succum excrementitium urinalem, in uesica embryonis collectum, ac per urachum, in umbilico transeuntem, transmissum, recipere debet. Quemadmodum uero origo liquoris amnii admodum obscura est, ita, ut auctores nondum inter se consentiant, utrum eundem ex uasis umbilicalibus, uel ex umbilico ipso, uel ex placenta, uel ex mammis foetus deriuare uelint: ita non minor inter eosdem occurrit dissensus, circa tertiam membranam, allantoidem dictam. Haec quidem membrana, in brutis grauidis dissectis, lotio plena manifeste apparet; eam tamen in humanis corporibus, ob excrementorum defectum, raro inuenire licet. Ea de causa, multi ex recentioribus ipsius in homine existentiam plane negant, eiusque nullam esse necessitatem contendunt, inprimis, quoniam Anatomici exercitatissimi, urachum in foetu plerumque clausum esse, obseruarunt. Alii e contrario necessitatem huius membranae, in homine non tan-

tantum propugnant, sed etiam, eandem aliquo-
ties se reperisse, perhibent, eamque inter amni-
on & chorion collocant, ita, ut illa aequè, ac
haec, totum foetum inuoluat, quos inter in pri-
mis *Needham, le Graaf, atque Bidloo* eminent.
Totam uero controuersiam, uti nobis quidem
uidetur, terminare poterit obseruatio elegans
D. Hale, in Transact. Anglic. n. 271. p. 833. Ann.
1698. consignata, qui allantoidem in duplici sub-
iecto non modo obseruauit, sed etiam flatu di-
stentam conseruauit. Ea tamen foetum nulla-
tenus, sicut nec in brutis, ambit, sed amnio ac-
cumbit, & cum hoc commune aliquod latus
constituit: uti ex icone, *loc. cit.* addita, omni-
um optime perspicui potest. Vrachi uero per-
forationem, praeter aliorum obseruationes,
confirmat illa, quam yongius quondam in pue-
ro sex annorum uidit, qui omnem fere urinam,
a primo ortu, per umbilicum reddidit: quod i-
psum pariter consignatum uidere est in *Trans-*
act. n. 323. p. 423. Quale etiam exemplum ex
Historia Regiae Scientiarum Academiae, a
Domino Littre, in uiro XXX. annorum obser-
uatum, recenset Clarissimus *Verdries, in Ephem.*
Germ. Cent. VI. obs. XIV. ubi pariter experi-
mentum curiosum Celeberrimi *Ridley*, ad de-
tegen-

tegendam urachi cauitatem, institutum, ad imitandum proponit.

THES. V.

Ita ergo foetus, membranis suis inuolutus, ac in succo amnii innatans, in domicilio suo tamdiu retinetur, donec idem auctus ac perfectus, partus tempore appropinquante, non tam, ob spatii angustiam, aut nutrimenti defectum, quam ob turgescentiam succorum priorum fortio-rem, ac aeris liberioris appetitum, exitum parat. Idem quippe, anxietate praecordiorum coactus, uariis motionibus atque iectigationibus circumactus, tandem uersus orificium uteri internum inclinat, illudque capite premendo, ac pedibus uersus uteri fundum calcitrando, hunc ad sui expulsionem concitat. Hoc tamen non, nisi termino partus constituto, in hominibus aequae, ac brutis, certo, per naturam fieri solet, expletis nimirum nouem in utero mensibus. Quamuis enim quidam, partus terminum in hominibus incertum esse, existiment, partumque perfectum non solum citius, mensibus nimirum sexto, septimo, atque octauo, sed etiam tardius, decimo, undecimo, atque duodecimo fieri posse, sibi persuadeant; eundem

dem tamen certissimum, ac per naturam immutabilem esse, rationes grauissimae quamplures euincunt. Apparet sane pariendi tempus quandoque uagum, atque fallax, cum foeminae ipsae, ob conceptionis principium ignoratum, non raro fallantur; probe tamen instructae, & quae se norunt, non diem, sed horam, & uel momentum instantis partus sibi praedicere possunt: uti auctor nobis est *Schellhammerus, Analect, Anatom. Physiolog. Exerc. XII. sect. III. thes. 17.* Idem hoc loco illustre huius rei exemplum adducit, Serenissimae Ducis Ienensis Bernhardi uxoris, Regia stirpe, e domo Tremullia, ortae, quae partus instantis momentum exacte praedixit, nec unquam in calculo errauit.

THES. VI.

Quemadmodum uero, ante finem noni mensis, nullus partus naturalis, ac ex omni parte perfectus editur: ita nec foetus, per naturam diutius, post illud tempus, in utero materno remanere potest. Aliter tamen se res habet, ubi foetus, ab exitu totaliter, ob uarias causas, interclusus ac impeditus, in utero emoritur, atque, nisi remoueri queat, putredine consumptus, matrem ipsam iugulat. Dantur
C ta-

tamen casus rarissimi, quibus embryones, in utero retenti & mortui, ac postmodum indurati, per plures annos incorrupti, conseruati fuerunt. Inter ea exempla, singulare, ac plane inauditum est illud recentissimum, in pago Sueuico, prope Gemundam, Leinzell appellato, contingens, ubi ex foemina, XCIV. annorum foetus talis ossificatus, aut potius exsiccatus, fecundinis suis, globum osseum referentibus, adhuc inclusus, post mortem exsectus est, qui per XLVI. annos in utero materno haesit, uti hoc, descriptum & delineatum, uidere licet *in dissert. de foetu XLV l. annorum, Tubingae, sub Praesidio Clarissimi Camerarii habita*. Singularissimum & notatu dignissimum penitus in hoc casu est, omnemque fere fidem superat, quod foemina, foetu isto extincto, ac praesentibus licet omnibus partus indiciis, in utero, aut in tuba, uti uidetur, permanente, ab illo tempore tamen, adhuc bis foetus uiuos, & adhuc uiuentes, ediderit. Inde etiam factum est, ut misera illa, quando constanter affirmauit, se foetum illum adhuc utero gerere, fidem haud inuenerit, potius ludibrio ab ipsis Medicis habita sit, usque dum, post tantum temporis interuallum, exitus ueritatem rei comprobaret.

THES. VII.

Foetum autem mortuum, licet non ossifica-
tum, ad aliquod tempus, sine corruptione,
in utero contineri posse, alio quodam exem-
plo, ex familia brutorum desumpto, compro-
bandi, nobis in praesenti se offert occasio.
Dum enim haec scribimus, offertur nobis a la-
nitione huius ciuitatis uterus ouilis, foetu re-
pletus, ex oue, ab anno tumore insigni lateris
sinistri affecta, exsectus, quae pro grauida qui-
dem habita, partum tamen nec anno superio-
ri, nec praesenti edidit. Re ista singulari per-
motus lanio, ouem per annum nutriens, sine spe
sobolis ab ea acquirendae, tandem consilium
cepit ouem maectandi, utrumque resectum no-
bis obtulit. Erat autem hic arctissime circa
foetum contractus: quo, cum membranis, hunc
inuoluentibus, aperto, aliquot unciae liquoris
aeruginosi, coloris crocei, omni tamen foetore
destituti, effluebant. Tunc autem in conspe-
ctum prodibat foetus, omni ex parte perfectus
& maturus, sed mortuus, & obtorto capite ia-
cens. Inciso embryonis corpore, interiora e-
ius nitida atque incorrupta, carni recenter ma-
tatae similia, sine ullo odore foetido ac pu-
redine, inuenimus; omnia tamen uiscera inter-

na flaccida, exsucca, & exsanguia deprehendimus. Canalis alimentorum contractus, ac ab excrementis, ibi contentis, flauescente & nigricante colore tinctus, sine ulla tamen corruptione, ita, ut inflationes ac iniectiones uiolentas, mediante siphone, ad intestina, in totum fere conglutinata, expandenda, factas, sine ruptura sustineret. Ex corde ac canalibus maioribus sectis, nil, praeter pauxillum liquoris, loturae carnis similis, effluebat, in toto uero corpore ne guttula quidem sanguinis, aut purulentae materiae apparebat. Foetus hic perfectus ac maturus, & quoad internas & externas partes sanus, ac optime constitutus, quamobrem in lucem non fuerit editus, nullam aliam reperire potuimus causam, praeterquam, quod ille sinistra coxendice connatus, ac conglutinatus cute lanata cum secundinis, ac utero ipso, ad palmae latitudinem tam firmiter cohaereat, ut, sine membranarum ac uteri dilaceratione, separari nequeat: uti id ipsum in foetu, a nobis conseruato, unicuique monstrare integrum est. Interim tamen embryo iste, si non ab anno praeterito, quod certo affirmare non possumus, a quatuor tamen minimum mensibus, post mortem sine corruptione, in utero materno integer

ger conseruatus est, nullumque est dubium, quin idem, diuturnitate temporis magis exsiccat & induratus, adhuc diutius ibidem contineri potuisset.

THE S. VIII.

Perpenfis itaque ingrauidationis conditionibus, nunc, ut propius ad impraegnationem spuriam explicandam accedamus, ueniendum nobis est ad signa ingrauidationis uerae. Quamprimum mulier in utero concepit, eadem, ob influxum succorum, uersus uterum largius concitatum, ac circuitum propterea sanguinis uitalem uehementer alteratum, genusque neruorum inprimis grauitè affectum, uarias, easque insignes in corpore communiter experitur mutationes. Ita enim de eo *Hippocrates, de Principiis: Mulier, cum in uentre concepit, statim horret, & calor, & dentium stridor consequitur, & conuulsio occupat tum articulos, tum totum corpus, & uterum segnities, ac torpor.* At longe plura impraegnationis indicia paulo post sequi solent, quorum tantus est numerus, ut uix omnia recenseri queant, quae in mulierculis obseruantur, collegit tamen ea *Pechlinus; in Observat. Phys. Med. L. I. obs. 45.* Sunt, inquit, *alacres, &*

uegetae, quae, simul ac contagio seminali sunt infectae, uelut ad nocentis aurae halitum, aliam induunt naturam, corporisque & animi dotes lente amittunt. Statim enim uultum solitus destituit rubor, oculorum orbitae excavantur, & liuescunt, caputque & lumbi doloribus, artus omnes lassitudine perfunduntur, appetitus non tantum nullus, sed & degener, & ad inepta praepostera persuasionem productus, consuetorum alimentorum etiam memoria grauis, aspectus saepe intolerabilis, usus diris symptomatibus, inde & uomitu uindicatus; insuetorum contra incredibilis appetentia, & si, cum petuntur, deficiunt, major, quam a praesentibus noxa; coctio uentriculi, aluus & pleraeque inde functiones deprauatae. Et haec quidem non omnibus, nec simul & semel; sed aliis initio, aliis toto tempore, aliis proxime ante partum eueniunt. Haec tamen indicia grauiditatis, quamuis in quamplurimis obseruentur; ea tamen, uti ipsi auctores fatentur, ac quotidiana experientia docet, nullatenus uniuersalia ac perpetua, sed ad accidentalialia potius sunt referenda. Non raro enim euenire solet, imo utplurimum fit, ut uirgines morbosae & pallefcentes, post conceptionem, uiuidiores, uegetiores, meliusque ualentes euadant. Multo minus ex his, cum

Schelhammero loc. cit. §. 27. 28. concludere licet, conceptionem peragi, mediante circulo sanguinis, cuius beneficio aura feminalis a uenis ex utero ad sanguinem, & per hanc ad ouarium penetret, quia hae mutationes, uti ipse iudicat, nisi sanguine infecto, fieri nequeant. Quemadmodum enim nos nullum uidemus impedimentum, quare semen spirituosum non per eandem viam, per quam ouulum foecundatum ad uterum regreditur, accedere queat: ita alterationes istae, per uteri, propter uasa sanguifera & nervosa copiosissima, cum toto corpore consensus, explicari possunt.

THE S. IX.

Alia tamen, eaque magis essentialia, & quae per naturam graviditatem necessario sequuntur, indicia temporis successu in foeminis observari solent. Cessat nimirum regulariter, statim post conceptionem, fluxus sanguinis menstruus, percipitur a gravidis tensio abdominis, qua primum insensibiliter, post medium vero gestationis tempus manifesto abdomen intumescit, ac magis eleuatur. Eo ipso quoque in mammis, praecipue in papillis, pruritus atque punctorii dolores percipiuntur, ac lac quo-

quoque pededentim in iisdem colligitur, foetusque ipse, tandem adultior factus, motibus fortioribus sui praesentiam notam reddit. Haec quidem ita sunt comparata, ut, ubi coniunctim ac perfecte adfunt, graviditatem prae aliis indicare soleant; nihilo tamen fecius ista quoque signa, si separatim considerentur, aut imperfectiora sint, foeminis ipsis, multoque magis aliis imponere possunt. Quem enim latet, ex quocausis purgatio menstrua, etiam sine impraegnatione, turbari, aut plane cohiberi possit, cum e contrario grauidae interdum, quamvis rarius, ad dimidium gestationis tempus, imo ad partum usque eandem experiantur. Ex suppressione uero mensium, uulcerum obstructionibus, atque tumoribus aliis, oritur subinde intumescencia abdominis, non tantum flatulenta ac mutabilis, sed etiam durior & continua, qua deceptae mulierculae, grauidae sibi uidentur. Accedunt saepissime motus flatulenti, atque spasmodici, motibus foetus quodammodo analogi, qui, nisi accurate iudicentur, ac a ueris embryonis motibus distinguantur, tanto magis foeminis imponere solent. Lac quoque, uel liquor huic similis, in mammis cachecticarum, & mensium obstructione laborantium, saepissime reperitur.

Imo

Imo, quod omnium maximum est, signa ista non separatim, sed coniunctim quoque occurrunt, adeoque facilius fallunt, nisi, iisdem exquisitè examinatis, ac cum aliis circumstantiis concurrentibus collatis, aut ipso tandem exitu contrarium docente, fallacia detegatur. Lepidus admodum casus a *D. Hoyero, in Ephem. Germ. Cent. VI. obs. LXXIV.* narratur de Muliere LXXIII. annorum in duobus matrimoniis fecunda, in tertio uero per XVIII. annos sterili. Haec de nouo menses cum titillatione prorumpere sentiens, ac uiro cohabitans, non tantum abdominis tumorem, sed etiam mammas turgidas, lac fundentes, monstrauit. Tempore uero partus consueto accedente, molam loco foetus edidit.

THES. X.

Varia quidem sunt uitia, in corpore latentia, quae grauiditatis speciem quandam praese ferunt; ea tamen, si intentis oculis accurate considerentur, ac cum aegrarum dispositione, aliisque in corpore obseruatis conditionibus, conferantur, a prudentioribus omnino diiudicari possunt. Hydrops quidem abdominis atque tympanites, quamuis saepissime ingrauidatio-

D

tio-

tionis suspicionem efficiunt, pluribus specialibus accidentibus ab hac distinguuntur. Quemadmodum enim inflatio abdominis in tympanitide non continua est, sed varias uicissitudines habet: ita ipsa aqua, in hydrope abdomen inundans, fluctuatione sua, pro uaria corporis inclinatione, se satis superque prodit, nisi aqua ista in uisceribus, aut uesiculis includatur, qui hydrops faccatus Medicis audit. Attendendum tamen & hic, hydropem atque tympanitidem cum uera impraegnatione interdum coniungi, adeoque huius signa obscuriora, & cognitu admodum difficilia efficere, ut uere grauidae tales non aestimentur. Singulare huius rei exemplum in *Ephemer. German, Dec. 11. A. VIII. obs. 165.* recenset D. Albrechti foeminae hydropicae XLV. annorum, quae hydropis causa, incassum usurpatis fortissimis hydragogis, filium tandem enixa est. Imo *Platerus L. III. obs. 620.* mentionem facit foeminae, quae quoties uterum ferebat, toties quoque ascite laborauit. Cautos igitur & circumspectos hoc ipsum reddere debet Medicos, ne personis imprimis suspectis, apparentibus licet signis quibusdam cachexiae, fortiora statim emmenagoga, ac foetum expellentia exhibeant medicamen-

menta. Neque tamen ex sola abdominis intumescencia, uti a uulgo fieri solet, impraegnatio iudicanda, ne innocentibus iniuria fiat: qualia exempla toto die occurrunt. Ita *Sennertus Pr. l. 3. Part. VI. sect. 2. c. 3.* ex Iohanne Henzio refert de ancilla, eam ex diaetae erroribus, in mensium primum suppressionem, ac in uentris tumorem incidisse, & quoniam ea de causa ipsa male audiret, sectionem corporis post mortem, pro innocentiae testimonio petiisse. Fato infecuto, ac corpore aperto, tumor utriusque ovarii, capitis recens nati infantis magnitudine, lividus atque fungosus, plurimisque uesiculis aquosis, in ulcera degenerantibus, repletus, inventus fuit.

THES. XI.

Prae aliis, tumores & concreta uaria, in, aut circa uterum haerentia, grauiditatem mentiuntur, ita, ut uix, ac ne uix quidem, a uera discerni queant. Eo pertinet molarum generatio, quae, quoniam in ipso utero haerent, eodem modo, ac foetus crescunt, ipsumque uterum, cum quo cohaerent, ac ex quo nutrimentum capiunt, aequaliter afficiunt, omnia fere grauiditatis uerae signa praebent. Notae

sufficienter sunt fabulae, quae a uulgo de molis circumferuntur, easdem esse animalia monstrosa, ac uiua, ex imaginationis errore, aut congressu illicito, in corpore formata: quae omnia hic recensere, operae pretium non esse, existimamus. Vnicum tamen praetermittere hic non possumus, quod nobis contigit haud ita pridem, ubi uir quidam offerebat nobis molam, ab uxore sua abortiente in lucem emissam, oblongam, anterieus crassiore, & incisura, instar oris, notatam, posterius uero in acumen abeuntem, quae piscis figuram quodammodo monstrabat. Hanc, uir iste, non tantum uixisse, quia, aquae iniecta, fluctuauerat, sed etiam ab obstetrice, mediante fabula futoria (erat enim uir iste futor) occidendi animo perforatam, sonum, uel clamorem edidisse, affirmabat; quam tamen nil aliud esse, quam massam carnosam informem, cognouimus. Commouit haec uulgi persuasio laudatissimum *Ruyfchium*, ut, conuocatis aliquando omnibus, quot quot Amstelodami fuerunt, obstetricibus, quarum numerus haud fuit exiguus, easdem examinaret, & percontaretur, quid circa molas obseruassent. Nulla tamen ex illis quicquam aliud de his reuelare potuit, quam, quod corpora carnosae & dura saepius depre-

deprehenderint, nunquam uero talia uiuentia ab ipsis reperta fuisse: ut idem narrat *in Obseru. Anat. Chirurg. LVIII.*

THES. XII.

Molarum ipsarum origo, atque generatio, admodum suspensos reddidit Medicos, quid de ea sentiendum sit. Communiter quidem tales, ex relicta in utero, ac huic cohaerente particula placentae, ortum trahunt, quando haec, cum uasis uterinis adhuc coniuncta, nutrimentum capit, ac in tantam molem, foemini molestam, augetur: unde nomen accepisse, patet. At enim uero huiuscemodi mola, non tantum a foeminis maritatis, aliquo iam partu antegresso, sed etiam, antequam pepererunt, excluduntur: ubi fane iniuria foret, omnes accusare, easdem, ante matrimonium contractum, iam partum, aut abortum passas esse. Huic tamen dubio optime occurrere possumus, si concreta ista, ex utero exclusa, cum saepius celebrato *Ruyfchio* distinguamus. Hic enim, *in obseruat. Chirurg. obs. XXVIII. & XXIX.* docet, probe discernendas esse molas ueras, ex particula placentae foetus maturi, in lucem emissi, abrupta, & in utero retenta, a pseudomolis, a placentula

integra foetus duorum, trium, quatuorue mensium, in matre extincti, uel abortu expulsi, quae compressione uteri induratae, rotundam, aut oblongam, interdum quoque animalium figuram exhibent. His aliud adhuc pseudomolarum genus *Idem* addit, massam nimirum cruoris, aut sanguinis coagulati, & uteri compressione indurati, quae pariter molae speciem prae se ferre solet. In harum ab illis dignotione respiciendum esse, docet, ad duo illa momenta, an funiculi abrupti uestigium adsit, & an uasis sanguiferis gaudeant, sine quibus non possint uocari placentulae retentae. Pariter etiam alia concreta, extra uterum reperiunda, cum molis nullatenus confundenda sunt: id, quod Marquardus fecit, qui duas molas extra matricem, unam huic fortissime adhaerentem, alteram in latere sinistro, circa uasa seminaria, in quantitate capitis, in muliere Viennensi repertas, refert, *Pract. Theoret. & Emphyric. cap. 5. de Mola*, quarum originem quoque idem inde deducit, quod foemina illa uenerea, uiro seni impotenti nupta, caste & honeste uixerit.

THES. XIII.

Praeter molas, in utero generatas, ingrauidationem quoque mentiuntur alia concreta praeternaturalia, in matrice ipsa, aut extra eandem reperiunda. Sic grauiditatem spuriam, ex utero ulceroso, carnem spongiosam & putridam continentem, habet *Hildanus, Cent. II. Obs. 55.* ex massa pultiformi, in utero contenta, *Arculanus Comment. ad Cap. de Mola Lib. IX. Almanzor.* ex calculis, in utero contentis, in Comitissa a Gleichen, *Moeb. Fundam. Med. Physiolog. cap. 20.* ex uesicae abscessu, *Helwigius, Obs. 124.* ex ouario dextro, ad magnitudinem oui gallinacei aucto, *Marchettis, Anat. cap. 7.* Quae exempla, cum pluribus aliis, aliorum auctorum observationibus, uidere licet apud *Bonett. Anat. Pract. L. III. Sect. 37. Obs. 1.* Quo propius igitur tumores, uel alia concreta praeternaturalia, uteri regioni adiacent, aut in ipsa matrice conduntur, tanto magis grauiditatis speciem praeseferunt, nisi per alia signa ab hac discerni queant. Circumspectione igitur, hac in re iudicanda, maxima est opus, ut omnes circumstantiae rite perpendantur, utrum nimirum tumor abdominis, simili, ac tempore impraegnationis, modo, primum lente, sed successiue sensibilius incre-

incrementum capiat, an uero idem subito crescat, uel tandem nimis augeatur, uel potius in eodem statu subsistat, aut alia cachexiae, uel alius status praeternaturalis signa concurrant? Quoniam tamen haec non exacte a mulierculis obseruantur, se ipsas, aliosque non raro fallunt. *Crucius, de Quaestis, Cent. I. p. 21.* refert, Imperatricem Augustam omnia signa uerae gestationis, tribus fere annis ante obitum, habuisse, ut omnes doctissimos Medicos & expertissimas mulieres deceperit, usque ad nonum mensem. In huius defunctae corpore aperto, praeter uiscerum plerorumque uitia, abdomen humore ichoroso, flauo plenum, uterus magnus, plenus humore albo crassissimo, ac, circa eius latera, & corpus, quinque tumores sat magni, eius substantiae adhaerentes, inuenti fuerunt.

THES. XIV.

Ad hunc ergo grauiditatis falsae ordinem pertinet quoque noster casus, in praesenti expositus, qui quidem primo tempore a uera uix dignosci potuit. Foemina enim consistentis aetatis, haud ita pridem gemellis procreatis, omnia fere ingrauidationis signa percipere, sibi persuaferat. Fluxus nimirum menstruus ad hoc usque

usque tempus durans, cessauit, hypogastrium a tumore illo ouarii succesſiue intumuit, lacti analogus liquor in mammis apparuit. Accedentibus praeterea motibus in abdomine, flatulentis quidem ac spasmodicis, non tamen, nisi accurata obseruatione, a ueris foetus motionibus diiudicandis, rationes sufficientes habere, sibi uisa est, quamobrem, se grauidam esse, crediderat. Tempore uero partus praeterlabente, ac abdomine in nimiam molem crescente, spes quidem ista euanuit, inhaesit nihilofecius animo opinio, foetum in utero extinctum, adhuc in corpore latere; quod tamen sectio, post obitum instituta, refutauit.

THES. XV.

Ex haftenus itaque allatis exemplis, & ex praesenti quoque nostro casu, satis constare, iudicamus, signa inpraegnationis adeo certa, infallibilia, ac uniuersalia non dari, quae omnibus foeminis competant, nec unquam deficiant, quoniam optima, ac per naturam in plerisque grauiditatem indicantia, interdum deficere & fallere uidimus. Occurrunt tamen exempla rariora foeminarum, quae, conceptione facta, indicia singularia, ac ipsis propria, eaque insueta penitus, ac extraordinaria,
E imo

imo paradoxa experiuntur, e quibus, se grauidas esse, certo cognoscunt. Notatu dignissimum est, quod *D. Hoyer in Ephem. German. Cent. VI. obs. LXXV.* de matrona generosa retulit, eam uirginitatis annis fluxum mensium regularem expertam esse, post matrimonium uero contractum, extra impraegnationis statum, nil quicquam huius percepisse. In hac, aliquoties grauida facta, tanquam certissimum impraegnationis inchoatae signum, menses apparuerunt, ac per totum gestationis tempus, usque ad partum, debitis interuallis se monstrarunt, sed, partu edito, ac lactatione peracta, sine ullo sanitatis dispendio, iterum cessarunt. Non minus curiosum est, quod ab *Ettmullero, loc. cit. Cent. I. obs. XLV.* de foemina perhibetur, quae, quotiescunque concepit, & antequam alia signa ingrauidationis sentiret, sanguinem ex bregmate sinistro extillare, percepit. Plura quoque talia, in scholio addito, enumerantur exempla, ex Panarolo, Fernelio, aliisque, ubi epilepsia, uena, in femoris interno latere, prope genu apparens, cephalalgia, & id generis singularia symptomata, impraegnationem factam esse, certo annunciarunt. Prae aliis autem memorabilis est casus, qui in *Dec. I. A. II. obs. CCXV.*

CCXV. a *Reifelio* relatus habetur, quo maritus, pro uxore grauida, uomitu ac pica laborans, sistitur, cuius quoque filius postea, contracto matrimonio, eadem symptomata passus est. Aequum omnino, nostra sententia, fuisset, ut uiri isti, more in Guayana, Americae regione, recepto, partu ab uxoribus edito, lectum occupassent, ac, puerperio cubantes, seruitia ab uxoribus, in grati animi tesseram ipsis praestanda, expectassent.

THE S. XVI.

Sed progrediendum nobis nunc est, ad specialem casus nostri considerationem, in quo ante omnia nobis ob oculos ponitur, tumor iste ouarii insignis, ingrauidationis huius spuriae, & ascitis subsecuti unica causa. Constabat idem ex folliculis membranosis, inter se cohaerentibus, ac externa ouarii tunica ualidissima comprehensis, muco lento atque uiscido turgidis, admista quoque hinc inde materia purulenta. Capsulae ipsae, cum externa tunica, crassissimae, ac uasorum sanguiferorum quoque perreptantium, canales insigniter distenti erant, ita, ut quidam eorum ad calami scriptorii capacitatem accederent. Fuerunt omnino folliculi isti nihil aliud, quam hydatides, a sero ui-

scido atque mucofo, extremitates uasorum fuc-
ceffiuè diffendente, ortae, quarum numero &
magnitudine crefcente, ouarium totum tan-
dem in hydatides degenerauit. Tales, ouulis
ueris interiectae, faepiffime in ouariis mulierum
reperiuntur, & cenfente laudato *Brendelio, diff.
de Hydropè ouariorum; Thef. IV.* neque ouu-
lis priores, neque aequales exiftunt, fed in
illis demum, quae aliquoties pepererunt, & ua-
rias iniurias in partibus genitalibus perpeffae
funt; Iftae enim frequentius in foeminis, quae
partum ediderunt, rarius, uel nunquam in uir-
ginibus fanis reperiuntur: uti uidere eft in *Ephem.
Germ. Dec. II. A. 5. obf. 207. & A. 6. obf. 164.*
Propterea tamen, ob hydatides faepe in oua-
rio occurrentes, illud ueficulare aut glandulo-
fum dici non poteft, quoniam, docente Claris-
fimo *Heiftero, Compend. Anatom. Adenolog. §. 367.*
ueficulare & glandulofum diffingui debent, ue-
ficulae autem aliae per naturam in ouario, prae-
ter ouula, non occurrunt, nec glandulae in fla-
tu naturali in eodem demonftrari poffunt. Eui-
cit quoque *Ruyfchius, Thef. Anat. VI. Explic.
Tab. V. fig. 3. 4. 5. 6.* uasorum fanguiferorum
extremitates hydatidum naturam uariis locis
induere: idque exemplis placentae uterinae, in
hy-

hydatides mutatae, confirmauit, quam tamen pariter, ac alia corporis nostri uiscera, nil glandulosi continere, exquisitissima sua arte praeparandi, clarum reddidit.

THES. XVII.

Quod si nunc de causa folliciti simus, tam copiosi hydatidum prouentus, atque expansionis ouarii insignis, eam certe nullam aliam, quam humorum, in suo circulo impeditorum, stagnationem, atque in nodosis, extremitatum uasorum anfractibus, collectionem fuisse, patet. Hanc si non unice produxit, occasionem certe eidem dedit, binorum ouorum foecundatio, ac, ab horum separatione, grauior ouarii laesio, in procreatione gemellorum antecedente, facta. Ex antea dictis enim constat, hydatides frequentius in foeminarum, aliquot iam partus expertarum, quam in uirginum ouariis ab Auctoribus obseruatas esse: quod docet, ouarium a conceptione, atque ouulorum foecundatorum eruptione, non parum affici. Confirmat hoc uberior tumor insignis, ab ouuli separatione in ouario relictus, tantae magnitudinis, ut dimidium interdum totius ouarii conficiat, qui rubedine primum perfusus, ac quasi inflammatus, successu uero temporis fugillatus, atque liuidus apparet.

ret. Corpus hoc luteum, &, uti uocatur, glandulosum, ex cuius sinu prodiit ouulum, saepe diutius post conceptionem remanet, ita, ut non raro post partum, adhuc turgidum inuentum fuerit: quemadmodum in foemina, Torgae, ob infanticidium commissum, aquis suffocata, obseruatum, legi potest, in *Physiol. Experim. Sect. VI. Cap. XI. Thes. 4.* Quae forte causa est, quare in non grauidis quoque, a *Malpighio* illud repertum sit, unde enata est suspicio, idem ante conceptionem in ouario existere, quod tamen antecedenti potius conceptioni, & partui adscribendum erit. Euincit tumor iste rubens, liuidusque, tamdiu permanens, ouulum foecundatum non, nisi ui, atque conatu, & turgescencia intrinseca, excitato humorum affluxu uberrimo, fractis repagulis, prorumpere, atque sic intumescenciae huic occasionem dare. Tanto maiorem laesionem in ouario fieri, a duplici ouulo, una uice erumpente, credendum est, quia eo ipso turgescencia fortior, largior humorum affluxus, & grauior fibrarum irritatio necessario concitatur. Id quoque probat obseruatio *Swammerdamii* qui, referente *Brendelio*, loc cit. in ouario sinistro foeminae, sex mensibus grauidae, &, editis abortu duobus gemellis, extinctae, uidit in-

inflammationem, & insignem cicatricem, qua incisa corpus flauum & fibrosum, gemina fouea, e qua ova gemella prodierunt, insculptum apparuit. Quamobrem non sine ratione iudicamus, gemellorum procreationem antecedentem, in nostra tumori ouarii ansam dedisse.

THES. XVIII.

Cognita igitur atque perspecta causa, tumoris huius in ouario, praecipua, facile est, iudicare de hydrope ascite, tandem accedente. Aucto quippe isto tumore, & cauitatem replente, non tantum ureteres, sed etiam uiscerum reliquorum, circumiacentium, ipsiusque uteri uasa, cum ouario communia, a pondere incumbente grauitur compressa fuerunt: quo ipso, motu sanguinis impedito, ac secretionibus turbatis, serum tandem in cauitatem non potuit exstillare. Confirmat hoc ureterum uehemens expansio, ac renum ipsorum flaccities, atque uesicae urinae compressio: quae omnia, urinae secretionem ualde imminutam, arguunt. Restat igitur tantum, ut de prolapsu uteri, in hoc subiecto obseruato, paucis adhuc agamus. Hic enim in sectione, a uagina prolapsa, adeo extra pubam protractus, inuentus est, ut nullum eius uestigium in pelui apparuerit. Imo nul-

nullus dubitandi locus datur, eundem adhuc longius elabi potuisse, nisi tumor ovarii praegrandis, in fundo ipsi alligatus, obstaculo fuisset. Experientia enim docuit, foeminas, prolapsu uteri, aut uaginae laborantes, facta conceptione, & uteri cauitate a foetu crescente dilatata, leuamen percepisse. Tale exemplum *Pechlinus loc. supr. cit. obs. XX.* in foemina, Lugduni Batauorum ab ipso obseruatum, recenset, quae, praeter alia incommoda, uehementi & uasta uaginae uteri procidentia afflicta fuit: singulis nihilofecius annis domum filio auxit, ac praeterea saepius abortiit. Illa enim, quamuis laboriosissime & decretorie pareret, non aliud tamen procidentiae remedium quaesuit, quam grauiditatem, utpote qua tumor lente retractus fuit intra corpus; idem uero, partu edito, iterum apparuit.

F I N I S.